

**Talamdan sa
Mga Mensahe alang sa Full-time Training
sa Fall Term sa 2022**

**LINANGKOB NGA HISGOTANAN:
MAGKINABUHI DIHA SA REALIDAD SA LAWAS NI CRISTO
SA PAGKAT-ON KANG CRISTO MAINGON NGA NAA NI JESUS ANG REALIDAD**

Mensahe 1

**Kat-onan si Cristo maingon nga Naa ni Jesus ang Realidad pinaagi sa Espiritu sa Realidad
aron Magkinabuhi sa Kinabuhi sa Dios-tawo aron Matuman ang Walay Kataposang Pamatigayon sa Dios**

Basahong Kasulatan: Efe. 4:20-24; Juan 16:13; 6:57

- I. Ang tinguha sa kasingkasing sa Dios mao nga ang realidad nga naa ni Jesus, ang Dios-tawong pagkinabuhi ni Jesus nga nasulat sa upat ka Ebanghelyo, mahulad unta diha sa daghang bahin sa Lawas ni Cristo pinaagi sa Espiritu sa realidad aron mahimong realidad sa Lawas ni Cristo, ang kinahabogang punto sa pamatigayon sa Dios—Efe. 4:20-24:**
- A. *Ang naa ni Jesus ang realidad* nagpasabot sa aktwal nga kahimtang sa kinabuhi ni Jesus ingon sa nasulat sa upat ka Ebanghelyo; nagkinabuhi si Jesus nga nagbuhat sa tanan diha sa Dios, uban sa Dios, ug alang sa Dios; naa sa Iyang pagkinabuhi ang Dios, ug nausa Siya sa Dios; kini ang gipasabot sa *naa ni Jesus ang realidad*—vv. 20-21:
 - 1. Wala mobuhat si Ginoong Jesus og bisan unsa sa Iya rang kaugalingon (Juan 5:19), wala Siya magbuhat sa kaugalingon Niyang buhat (4:34; 17:4), wala Siya mamulong sa kaugalingon Niyang pulong (14:10, 24), gibuhat Niya ang tanan dili sa kaugalingon Niyang kabubut-on (5:30), ug wala Siya magtinguha sa kaugalingon Niyang himaya (7:18); wala gyod Siya sukad mahigawad kay natagbaw ra man Siya sa Dios (Isa. 42:4; 50:4-5; 53:2a; itandi sa Juan 4:13-14; 6:15; Mar. 9:7-8).
 - 2. Tawo sa pag-ampo si Ginoong Jesus, nga nausa sa Dios, nagkinabuhi sa presensya sa Dios sa walay pag-undang, nisalig sa Dios ug dili sa Iyang Kaugalingon diha sa bisan unsang pag-antos ug paglutos, ug diha Niya walay bisan unsa (walay luna, walay paglaom, walay higayon, walay purohan sa bisan unsa) si Satanas, nga magbubuot sa kalibotan—Juan 10:30; 8:29; 14:30b; 16:32-33; 1 Ped. 2:23:
 - a. Tawo Siya nga naa sa unod nga nag-ampo sa misteryosong Dios diha sa diosnon ug misticong ginsakpan; sagad nga motungas Siya sa bukid o moadto ba sa hilit nga dapit aron mag-ampo—Mat. 14:23; Mar. 1:35; Luc. 5:16; 6:12; 9:28.
 - b. Wala gyod Siya sukad mag-inusara, kay nag-uban man Niya ang Amahan; matag gusto nakita Niya ang nawong sa Iyang Amahan—Juan 5:19; 16:32; Sal. 16:7-8.
 - B. Nianhi si Ginoong Jesus aron silbihan ta Niya sa Iyang Kaugalingon ingon nga kinabuhi; gisilbihan ta Niya kaniadto, gisilbihan ta karon, ug silbihan ta sa umalabot—Mar. 10:45; Luc. 22:26-27; Mar. 6:45-51; Juan 10:10; 6:48; 8:12; 13:4-8; 18:7-9; Luc. 12:37.
 - C. Ang bugtong kinabuhi nga gikahimut-an sa Dios mao ang kinabuhing pagsubli sa kinabuhing gikinabuhi ni Cristo dinhi sa yuta; gihingpit ta sa Ginoo aron mahimong mga Dios-tawo, nga magkinabuhi sa diosnong kinabuhi sa pagdumili nato sa atong natural nga kinabuhi segun sa sumbanan ni Cristo nga unang Dios-tawo—Mat. 11:29a; 17:5b; 1 Ped. 2:21.
 - D. Ang pagkinabuhi sa Lawas ni Cristo nga bag-ong tawo sama ra gyod unta sa pagkinabuhi ni Jesus; ang pagkinabuhi ni Jesus dinhi sa yuta mao gyod unta ang pagkinabuhi karon sa Lawas ni Cristo nga bag-ong tawo—Efe. 1:22-23; 2:10, 15; 4:20-24.

- E. Gipakita sa upat ka Ebanghelyo ang sumbanan sa kinabuhing gitinguha sa Dios, ang hulmahan sa kinabuhing makatagbaw sa Dios ug makatuman sa Iyang tuyo; ang pagkat-on kang Cristo pagkahulma man sa sumbanan ni Cristo, pagkasama sa dagway ni Cristo—Rom. 8:28-29; Efe. 4:21:
 1. Sa kinabuhi Niya dinhi sa yuta naghimo Siyag sumbanan, ingon sa gipadayag sa upat ka Ebanghelyo; unya gilansang Siya sa krus ug nabanhaw aron mahimong Espiritung taghatag-og-kinabuhi aron makasulod Siya nato ug mahimong atong kinabuhi; makat-on ta Niya, segun sa Iyang panig-ingnan, dili pinaagi sa atong natural nga kinabuhi kondili pinaagi Niya nga atong kinabuhi diha sa pagkabanhaw—1 Cor. 15:45b; Col. 3:4.
 2. Sa mahigugma ta sa Ginoo, mokontak Niya, ug moampo Kaniya, awtomatiko nato Siyang ikinabuhi segun sa hulmahan, sa porma, sa sumbanan, nga gihulagway sa mga Ebanghelyo; sa ingon niini mahulma ta, masama, sa dagway ning hulmahan—kini ang gipasabot sa makat-on kang Cristo—Mat. 11:29; Rom. 8:29.
 3. Ang Cristohanong kinabuhi nato kinabuhi nga naa ni Cristo ug kinabuhi sab ni Cristo nga naa nato; naa ta ni Cristo nga hulmahan, ug naa Siya nato ingon nga atong kinabuhi; sa ingon niini makat-on ta ni Cristo maingon nga naa ni Jesus ang realidad; kining realidad mao ang realidad sa Lawas ni Cristo—1 Cor. 1:30; 2 Cor. 5:17; 12:2a; Col. 1:27; Gal. 2:20; Rom. 8:10.
- F. Ang realidad sa Lawas ni Cristo mao ang hiniyang pagkinabuhi sa nahingpit nga mga Dios-tawo, nga nagkinabuhi sa diosnong kinabuhi sa ilang bag-ong tawo sa pagdumili nila sa natural nga kinabuhi sa ilang daang tawo segun sa sumbanan ni Cristo nga unang Dios-tawo; nagkinabuhi kining nahingpit nga mga Dios-tawo sa halad-kalan-on nga iglesiahang kinabuhi, napuno-sa-Espiritu, nasuropang-pagkabanhaw, giputli-sa-krus nga tawhanong pagkinabuhi nga hulad sa tawhanong pagkinabuhi ni Cristo—Mar. 8:34; Rom. 6:4-6; Gal. 2:20; Efe. 3:16-17a; 1 Ped. 2:21; Lev. 2:1-2, 4-5; 1 Cor. 12:12, 24; 10:17.
- G. Tinuod nga mga tawo kining nahingpit nga mga Dios-tawo, nga wala magkinabuhi sa ilang kinabuhi kondili sa hingpit gyong halangdon nga kinabuhi sa nahikay nga Dios, kansang mga kaayo napadayag pinaagi sa ilang maayong kagawian; sa hiniusa, sila si Jesus nga nagkinabuhi pag-usab dinhi sa yuta sa pagka-tawo Niya nga gipadato sa pagkadios—Fil. 1:19-21a; 3:10; 4:5-9, 11-13.

II. Ang realidad sa Lawas ni Cristo mao ang Espiritu sa realidad, nga mao ang Espiritu ni Jesus, nga nasagol sa atong espiritu; naglakip ang Espiritu ni Jesus sa realidad nga naa ni Jesus, sa Dios-tawong pagkinabuhi ni Jesus—Juan 16:13; 14:17; Buh. 16:7; Rom. 8:16; 1 Cor. 6:17:

- A. Gihimo ning Espiritu sa realidad ang tanang iya sa nahikay nga Tulo-usang Dios nga marealidad diha sa Lawas ni Cristo; giyahan ta sa Espiritu sa realidad nga naa nato ngadto sa realidad sa kinabuhi sa Lawas ni Cristo, sa realidad sa pagkinabuhi sa Dios-tawong kinabuhi pinaagi sa diosnong kinabuhi—Juan 16:13-15; Fil. 1:19; itandi sa Exo. 30:22-25.
- B. Ang Dios nga Igo-sa-tanan (Gen. 17:1; Fil. 1:19), nga Espiritu sa realidad nga nagpuyo sa atong espiritu aron ma-usa ka sinagol nga espiritu (Rom. 8:16; 1 Cor. 6:17), mao ang sekreto sa tanang pagkamao sa Tulo-usang Dios alang sa Lawas ni Cristo; aron makakinabuhi diha sa realidad sa Lawas ni Cristo, kinahanglan nga makaila, mogamit, ug magbansay ta sa atong espiritu (Efe. 1:17; 2:22; 3:5, 16; 4:23; 5:18; 6:18).
- C. Ang Espiritu sa realidad mao ang kinatibuk-an sa tanang kaayo sa nahikay nga Tulo-usang Dios; ang Espiritu sa realidad mao ang pagkaepektibo sa tanang kahikayan sa nahikay nga Tulo-usang Dios—Fil. 1:19-21a; 4:12; itandi sa Gen. 17:1.
- D. Ang Espiritu sa realidad nga nagpuyo sa atong espiritu nga gipanganak pag-usab nadugtong nga usa ka espiritu sa atong espiritu; ipabalik ug ipatumong gyod nato ang tibuok natong pagkatawo ning nausa nga espiritu, magkinabuhi ug maggawi uyon ning nausa nga espiritu—Rom. 8:4, 6, 9-11, 16; 1 Cor. 6:17:
 1. Magkinabuhi ngani ta sa ingon niana ning nausa nga espiritu, makinabuhi nato ang realidad sa Lawas ni Cristo nga mahimong hiniyang pagpadayag ni Cristo—Efe. 1:22b-23.

2. Magkinabuhi ug mamulong gyod ta diha sa realidad sa Lawas ni Cristo, sa ato pa, diha sa Espiritu; naa ngani ta sa Espiritu, naa ta sa pagkausa, kay naa man sa Espiritu ang pagkausa—Gal. 5:25; Rom. 8:4; 2 Cor. 3:6, 8; Efe. 4:3-4.
- E. Magkinabuhi ngani ta diha sa nasagol nga espiritu, nagkat-on ta ni Cristo segun sa realidad nga naa ni Jesus pinaagi sa Espiritu sa realidad segun sa Iyang sumbanan aron mahimong kasaysayan nato ang Iyang biograpiya; ang pagkinabuhi sa Lawas ni Cristo nga bag-ong tawo sama ra gyod unta sa pagkinabuhi ni Jesus nga gipadayag sa mga Ebanghelyo—Gal. 6:17-18; Rom. 1:1, 9; Efe. 4:20-24; Fil. 2:5.

III. Gipadayag sa Juan 6:57 unsaon ang realidad nga naa ni Jesus, ang Dios-tawong pagkinabuhi ni Jesus, mahimong realidad sa Lawas ni Cristo, ang hiniusang Dios-tawong pagkinabuhi sa bag-ong tawo nga hulad sa Dios-tawong pagkinabuhi ni Jesus:

- A. Niingon ang Juan 6:57a nga, “Maingon nga gipadala Ko sa buhing Amahan ug nabuhi Ko tungod sa Amahan”; kini ang realidad nga naa ni Jesus, ang Dios-tawong pagkinabuhi ni Jesus:
 1. Nabuhi si Ginoong Jesus *tungod sa* Amahan, sigeng nagpahimulos sa Amahan ingon nga “Langitong mantikilya,” nga nagtimaan sa kinadatoang grasya, ug “langitong dugos,” nga nagtimaan sa kinatam-isang gugma, nga nahimong sangkap nga nakapakinabuhi Niya sa Amahan ug gahom nga nakapasugot Niya sa Amahan aron mopili Siya sa hingpit nga kabubut-on sa Amahan—Isa. 7:14-15 [basaha ang ASV 1901; Darby's New Translation, KJV]; Exo. 3:8; Juan 1:14-17; 5:19-20; 8:29; 16:32; 17:26; Luc. 2:12; Fil. 2:8.
 2. Ang gahom sa pagsugot Niya sa Amahan mao ang pagkahimo Niyang tawo sa pag-ampo aron magpahimulos sa Amahan nga kinadatoang grasya ug kinatam-isang gugma Niya aron bug-os Siyang magpasakop sa Amahan para matuman ang hingpit nga kabubut-on sa Amahan—Mat. 11:25-30; 14:22-23; Mar. 1:35; 10:45; 14:36.
- B. Niingon ang Juan 6:57b nga, “Ingon man sab ang mokaon Nako, mabuhi sab tungod Nako”; kini ang realidad sa Lawas ni Cristo, ang hiniusang Dios-tawong pagkinabuhi sa daghang bahin sa Lawas ni Cristo, nga nagkat-on ni Cristo, nabuhi tungod ni Cristo, maingon nga naa ni Jesus ang realidad:
 1. Wala ta mabuhi *pinaagi* ni Cristo, nga naghimo ni Cristo nga atong instrumento; nabuhi ta *tungod ni* Cristo, nga naghimo ni Cristo nga sangkap sa atong pagkinabuhi; aron makakinabuhi tungod ni Cristo nga atong kalan-on, kan-on gyod nato Siya aron mahimo Siyang sangkap ug kalagsik nga mabuhi sa sulod nato ug pinaagi nato aron matukod ang Iyang Lawas nga maoy hingpit nga kabubut-on sa Dios—v. 63; Jer. 15:16; Rom. 8:2; 12:1-2.
 2. Mahimo tang hulad Niya sa pagkontak nato Niya nga mapuangoron adlaw-adlaw aron mabago ta matag buntag, nga moingon, “Ginoong Jesus, gihigugma Ka nako”; makasultianay dayon ta Niya ug makakaon Niya sa pagkaon nato sa Iyang mga pulong aron makapahimulos Niya, makakinabuhi Niya, ug mahimong Siya.
- C. Ang tuyo sa Dios sa pagpadala Niya ni Ginoong Jesus para mahimong tawo aron man magkinabuhi Siya sa Dios-tawong kinabuhi pinaagi sa diosnong kinabuhi; mokaon ngani ta Niya, mabuhi ta tungod Niya aron mahimong unibersohanong dakong tawo nga sama gyod Niya—tawo nga nagkinabuhi sa Dios-tawong kinabuhi pinaagi sa diosnong kinabuhi—Lam. 3:22-24, 55-56; Bug. 2:4; 7; Juan 6:57, 63; Jer. 15:16; Efe. 6:17-18; Sal. 119:15.

IV. Maghimo natong hiniusang sumbanan, ang realidad sa Lawas, kining hiniusang Dios-tawong pagkinabuhi; kanang sumbanana unya ang kinadak-ang pagkadasig pag-usab sa kasaysayan sa iglesia nga magpabalik sa Ginoo—Mat. 16:18; Bug. 19:7-8.